

HEIMAVIST MA OG VMA

Eyrarlandsvegur 28 • 600 Akureyri • sími 455-1600 • Fax 455-1601
www.heimavist.is • heimavist@heimavist.is • Kt. 630107-0160



Skýrsla fyrir skólaárið 2023-2024

Almennt

Lundur rekur nemendagarða fyrir báða framhaldsskólana á Akureyri; annars vegar í byggingu Lundar frá 2003 og hins vegar í eldri byggingu sem áður hýsti Heimavist MA. Byggingarnar eru tengdar saman með björtu og rúmgóðu anddyri.

Lundur er sjálfseignarstofnun sem rekur nemendagarðana á grundvelli þjónustusamnings við menntamálaráðuneytið (nú Mennta- og barnamálaráðuneytið) frá desember 2001. Samningurinn kveður á um að Lundur tryggi íbúum nemendagarðanna frambærilegt húsnaði til búsetu, öruggar og heimilislegar aðstæður ásamt eftirliti með íbúunum auk viðunandi þvottþjónustu og fullnægjandi mötuneytisaðstöðu. Með samningi við Mötuneyti MA felur Lundur mötuneyti MA að reka mötuneyti og þvottahús á nemendagörðunum samkvæmt þjónustusamningi Lundar við menntamálaráðuneytið (nú Mennta- og barnamálaráðuneytið).

Á nemendagörðum Lundar er rými fyrir 333 íbúa og er þá miðað við að tvímennt sé í öll herbergi á nýju vist, í þrjú stærri herbergi á gömlu vistinni auk níu herbergja á svítum. Hefðbundnu herbergin á gömlu vistinni eru nýtt sem einstaklings herbergi á veturna.

Aðsókn

Þegar lokað var fyrir umsóknir í byrjun júní var aðsóknin svipuð og árið á undan og engir biðlistar. Minni aðsókn undanfarin ár hefur gert það að verkum að hægt er að bjóða einstaklingum upp á að leigja sér tveggja manna herbergi með baði sem áður hefði ekki staðið til boða. Með þessu móti hefur verið hægt að ná nokkuð góðri nýtingu á húsnaðinu.

Ætlast hefur verið til að íbúar skuldbindi sig til að búa á Heimavistinni yfir skólaárið á meðan þeir halda eðlilegri námsframvindu, enda er góð nýting mikilvæg fjárhagsleg forsenda heimavistarinnar.

Nemendum sem hætta námi eða falla frá námi er þó unnt að segja upp húsaleigusamningi með stuttum fyrirvara.

Gengið er út frá því að ólögráða nemendur beggja skóla hafi forgang svo og nemendur sem sækja sérnám sem ekki er að finna í þeirra heimabyggð eða nám sem er mikilvægt skólunum. Að þessu frátöldu er lausu rými úthlutað í venjulegu hlutfalli 2/3 MA og 1/3 VMA, þó þannig að skólameistarar og framkvæmdastjóri Lundar leysi sameiginlega úr vandamálum, ef upp koma.

Fjöldi íbúa

Þegar heimavistin hóf starfsemi haustið 2023 voru flest öll herbergi nýtt en líkt og áður eiga þó nokkrar breytingar sér stað á þeirri íbúaskrá sem lagt er af stað með inn í skólaárið að hausti.

Ef miðað er við íbúafjölda 1. október 2023 þá voru alls 295 íbúar á heimavistinni eða 145 íbúar í MA og 150 íbúar í VMA. Ef horft er til ársins á undan eru það 2 íbúum fleiri en á sama tíma árið 2022.

Kynjahlutfall allra íbúa er svipað og árinu áður eða 54% stúlkur og 46% piltar. Hlutfallið skiptist þannig á milli skólanna: Hjá íbúum VMA voru alls 37% stúlkur og 63% piltar samanborið við 40% stúlkur og 60% pilta árinu áður. Hjá MA íbúum voru stúlkur 70% og piltar 30% en árinu áður var hlutfallið 72% stúlkur og 28% piltar.

Ef skoðuð er tafla 1 yfir aldursdreifingu íbúa haustið 2023 (miðað við 1. október) voru 77% allra íbúa ólögráða sem skiptist þannig: 86% MA íbúa voru ólögráða og 69% VMA íbúa voru ólögráða. Hlutfall ólögráða er mjög svipað skólaárinu á undan.

Tafla 1 - Aldursdreifing íbúa í október 2023

	Aldursdreifing allra íbúa	Aldursdreifing MA íbúa	Aldursdreifing VMA íbúa
Íbúar fæddir árið 2008	1%	0%	1%
Íbúar fæddir árið 2007	35%	39%	31%
Íbúar fæddir árið 2006	37%	42%	32%
Íbúar fæddir árið 2005	21%	18%	24%
Íbúar fæddir árið 2004	5%	1%	9%
Íbúar fæddir 2000-2003	1%	0%	3%
	100%	100%	100%

Systkini

Á hverju skólaári dvelja systkini á heimavistinni en þau fá sérstakan systkinaafslátt af húsaleigunni. Skólaárið 2023-2024 bjuggu alls 14 systkinapör (28 íbúar) á heimavistinni.

Lögheimili nemenda

Íbúar sækja heimavistina víða að af landinu og eins erlendis frá eins og tafla 2 sýnir, en hún sýnir flokkun íbúa eftir lögheimili í október 2023:

Tafla 2 - Skipting íbúa eftir skólum og lögheimili í október 2023

	VMA íbúar	MA íbúar	Allir íbúar
Suðurland og suðvesturland	8%	20%	14%
Vesturland	10%	6%	8%
Vestfirðir	6%	7%	6%
Norðurland vestra	25%	17%	21%
Eyjafjörður (þ.m.t. Siglufjörður)	20%	21%	21%
Norðurland eystra utan Eyjafjarðar	9%	17%	13%
Austurland	22%	12%	17%
Erlendis	0%	0%	0%
	100%	100%	100%

Skólaárið 2023-2024 var jafn stór hluti íbúanna frá Eyjafirði þ.m.t. Siglufirði og frá Norðurlandi vestra eða 21% en árinu áður voru þeir flestir frá Eyjafirði þ.m.t. Siglufirði. Flestir VMA íbúar koma frá Norðurlandi vestra eða 25% en flestir MA íbúar koma frá Eyjafirði (þ.m.t. Siglufjörður) eða 21%.

Heimili íbúa

Heimavist MA og VMA á að vera tryggt og öruggt heimili fyrir íbúana og er kappkostað að svo sé enda mikilvægt fyrir íbúa og foreldra/forráðamenn að haft sé eftirlit með hegðan og líðan íbúanna eins og kostur er. Lögð er áhersla líkt og áður á að íbúar temji sér góða umgengni á heimavistinni, umhirðu herbergja sinna, virði næðistíma og að öll meðferð áfengis og fíkniefna sé stranglega bönnuð og varði brottrekstur.

Reglum og eftirliti með hegðan og líðan íbúanna var skólaárið 2023-2024 líkt og undanfarin ár fylgt eftir með uppbyggilegum ábendingum og afskiptum eftir þörfum. Fundir með íbúum s.k. gangafundir voru í upphafi skólaársins og í byrjun vorannar en þar eru reglur heimavistarinnar m.a. áréttaðar. Gangafundir eru einnig mikilvægur vettvangur fyrir íbúa að hitta aðra íbúa, starfsmenn og einnig fulltrúa í heimavistarráði.

Sú breyting varð á skólaárinu á undan að ekki var boðið upp á viðveru hjúkrunarfræðings á heimavistinni eins og verið hefur. Hjúkrunarfræðingur var hins vegar með viðveru í MA og VMA sem var samstarfsverkefni skólanna og Heilbrigðisstofnunar Norðurlands (HSN).

Haldin var rýmiæfing 19. september sem tókst með ágætum en mikilvægt er fyrir íbúa jafnt sem starfsmenn að æfa rýmingu á húsnaðinu ef á þarf að halda. Eftir rýmingu heimavistarinnar söfnuðust íbúar saman í Kvosinni í MA þar sem starfsmenn frá eldvarnareftirlitinu fóru yfir hvernig til hefði tekist og hvað þyrfti að bæta. Gert er ráð fyrir að íbúar safnist saman í Kvosinni ef til raunverulegrar rýmingar kemur.

Hagsmunamál íbúa

Íbúar kjósa sér hagsmunaráð heimavistarinnar, öðru nafni Heimavistarráð. Heimavistarráð hefur starfað með framkvæmdastjóra og öðrum starfsmönnum og unnið að framgangi sameiginlegra hagsmunamála íbúanna. Þá hefur Heimavistarráð séð um og skipulagt félagsstarf og unnið að undirbúningi viðburða á heimavistinni.

Á skólaárinu 2023-2024 stóð heimavistarráð fyrir ýmsum viðburðum sem voru vel sóttir af íbúum. Haldin voru spila- og kahootkvöld, staðið fyrir jólafondri og piparkökumálun auk jólahlaðborðs í samvinnu við Mötuneytið. Þá stóð heimavistarráð fyrir því að skreyta í tilefni af hrekkjavöku og fyrir páskafrí var haldið veglegt páskabingó.

Agamál

Í samstarfi við skólameistara hefur Lundur mótað skýrar vinnureglur um meðferð og afleiðingar áfengisbrota á heimavistinni. Viðurlög við áfengisbrotum fara eftir eðli brotanna en drykkja íbúa inn á heimavist getur varðað riftun á húsaleigusamningi. Þá hafa einnig verið mótaðar vinnureglur um meðferð og afleiðingar vímuefnanotkunar sem eru með alvarlegri brotum á agareglum heimavistarinnar.

Á skólaárinu voru sex íbúar áminntir vegna áfengisbrota og þurftu að dvelja utan vistar um helgar út önnina. Á skólaárinu koma ýmis atvik upp og hvert og eitt þeirra er leyst jafnóðum af þjónustustjóra og framkvæmdastjóra ef þörf þykir.

Skipulags- og rekstrarmál.

Á skólaárinu 2023-2024 störfuðu tíu starfsmenn á heimavistinni. Fyrir utan framkvæmdastjóra og þjónustustjóra störfuðu tveir starfsmenn á næturvakt, tveir starfsmenn á skiptum vöktum á daginn og á kvöldin, einn starfsmaður á morgunvöktum, tveir helgarstarfsmenn og einn starfsmaður sem sinnti bæði húsumsjón og næturvörslu.

Líkt og áður unnu íbúar á heimavistinni yfir vetrartímann. Starfið fólst í ýmis konar aðstoð við starfsmenn á vakt s.s. við að ryksuga, fylla á lagera o.s.frv. Tveir íbúar störfuðu yfir vetrartímann og unnu að jafnaði alls 2-4 klst. á viku.

Á árinu var ráðist í þónokkrar endurbætur. Drenað var í kringum gömlu vist. Norðurorka nýtti tækifærið og endurnýjaði vatnslögn sem var lögð í kringum húsið, en lögnin hafði áður legið undir húsinu. Ný þakrör voru sett utan á gömlu vist og voru þau fullfrágengin með dreni í jörð og út í brunn sem er á norðurvegg þvottahúss auk þess sem það var sett vatnsfæliefni á svalir sem snúa í norður fyrir ofan „starfsmannainngang“ Á nýju vistinni var haldið áfram að skipta út þeim sturtuklefum sem ekki hafði verið skipt út árið á undan, samtals voru það 43 nýjir sturtuklefar.

Þar með var mikilvægum áfanga náð, þ.e. búið að skipta út öllum sturtuklefum á nýju vistinni. Skipt var um undirstöður undir baðherbergisborðum á nýju vist, 118 borð. Gluggar á gömlu vist voru málaðir að utan, það á eftir að klára örfáa glugga á austurhlið og turni á gömlu vist (fyrir ofan matsal). Það var haldið áfram að skipta um fataskápa og fataskápar á tveimur svítum á gömlu vist voru endurnýjaðir. Fjárfest var í miklu magni af parketi til að eiga fyrir þriðju hæð og svítur.

Kynningarmál

Þann 1. nóvember 2023 tókum við á móti grunnskólanemendum úr nágretta byggðarlögum í samstarfi við námsráðgjafa skólanna líkt og verið hefur. Alls komu um 200 nemendur í heimsókn og voru nokkrir íbúar á heimavistinni frá viðkomandi byggðarlagi og skóla fengnir til að taka þátt í kynningunum með starfsfólki. Þessar kynningar eru líkt og áður mjög mikilvægar fyrir starfsemina.

Stjórn

Í stjórn Lundar skólaárið 2023-2024 sátu Kristín Sigfúsdóttir stjórnarformaður, Björk Guðmundsdóttir, Jónas Jónsson, María Björg Sigurðardóttir (fyrir hönd heimavistarráðs) og Unnar Vilhjálmsson. Enn fremur sátu fundi Karl Frímannsson skólameistari MA, Sigríður Huld skólameistari VMA og Þóra Ragnheiður Stefánsdóttir framkvæmdastjóri Lundar. Breytingar á stjórn Lundar sem kom til samþykktar á 151. Stjórnarfundum þann 21. febrúar 2024 voru þær að Óli Þór Jónsson kom inn sem varamaður fyrir MA.